

Sidang Negara2 Berkecuali



DATUK Seri Dr Mahathir dan Tan Sri Ghazali mendengar perbincangan

Penaklukan Vietnam di Kampuchea dibantah

NEW DELHI, Rabu — Pemimpin-pemimpin berhaluan sederhana Asia semalam dengan keras membantah terhadap penaklukan terus-menerus Vietnam di Kampuchea, walaupun persetujuan telah dicapai sebelumnya untuk membataskan perbincangan mengenai isu itu kerana terdapat pandangan yang berbeza di kalangan anggota.

Perdana Menteri Malaysia, Dr Mahathir Mohamad berkata angkatan tentera Vietnam menakluki Kampuchea pada tahun 1978 untuk meletakkan 'kerajaan boneka' Heng Samrin. Ini bermakna mereka telah menceroboh kemerdekaan Kampuchea dan 'semua prinsip yang ditegakkan oleh Pergerakan Negara-Negara Berkecuali.'

Beliau mengulangi tuntutan kesemua anggota berkecuali dari negara-negara Asean agar sidang itu mengiktiraf dengan rasmi pemimpin kerajaan campuran anti-Vietnam, Putera Norodom Sihanouk, dan mengesep rejim Heng Samrin sebagai tidak sah.

Isu itu menyebabkan sidang awal peringkat menteri yang dihadiri 100 negara itu hampir terbahagi dua dengan negara-negara berpendirian sederhana

menuntut pengiktirafan Sihanouk dan negara-negara penyokong Russia yang diketuai oleh Vietnam dan Cuba menuntut pengiktirafan Heng Samrin.

Persetujuan tunggal yang dicapai mereka hanya untuk mengosongkan kerusi Kampuchea sebagaimana di sidang kemuncak sebelum itu di Havana, Cuba pada tahun 1979. Persidangan negara-negara berkecuali hanya boleh mengambil keputusan dengan bermufakat tetapi tidak melalui undi.

Perdana Menteri Vietnam, Pham Van Dong, mendengar semua bantahan tersebut dengan selamba. Beliau kemudian membaca ucapan yang telah disediakan tanpa memedulikan kontroversi yang ditimbulkan.

Pegawai-pegawai India yang menyangka isu itu tidak dibangkitkan lagi dalam sidang kemuncak itu marah ia dibangkitkan juga. Menteri-Menteri Luar itu serentak membincangkan Perisytiharan Draf India yang menekankan "kurang balknya menggunakan paksa ke atas negara-negara yang berdaulat," tetapi tidak secara terang menyentuh pencerobohan ke atas Kampuchea. —AP.